



berria

2010-09-08

Tabakoaren Lege berria

Debekua, gertuago

Adingabeen babes handitu eta leku publiko itxietan erretzea debekatzea du helburu Jaurlaritzaren Tabakoaren Legea aldatzeko proposamenak. 2011. urtearen hasieran indarrean izatea espero du.

Jon Rejado. Gasteiz

Tabakoaren kea tabernetatik aterako duen haizetea gero eta gertuago dago. Haizete bortitza izango dela iragar daiteke, gainera. Hori nahi du, behintzat, Eusko Jaurlaritzak onartu berri duen Tabako Legea aldatzeko proposamenak. Bi helburu nagusi zehaztu ditu, batez ere. Lehena, toki publiko itxietan tabakoaren debekua erabatekoa izatea: taberna eta jatetxeetan, kasu. Bigarrena, adingabeen osasuna babestea da.

Tabakoaren aurkako borrokan lehen haize ufada gogorra 2005. urtean heldu zen Espainiatik. Bertako Tabakoaren Aurkako Legeak lantokietan erretzea debekatu zuen, eta lehen arauak ezarri zizkien taberna eta jatetxeei. Baina azken horienganako arauak lausoegiak izan ziren, eta ez zuten eraginik izan Hego Euskal Herrian. Eusko Jaurlaritzak onartu nahi duen lege aldaketak hori zuzendu nahi du, eta debekua zorrotz ezarri.

Toki publiko itxi guztiek bete beharko dute legea, tabernek eta jatetxeek barne; baita kalean egon arren eremuaren erdia baino gehiago estalita duten tokiek ere. «Herritar guztien osasunaren alde emandako pausoa da. Hartuko den erabakian uste osoa dugu», nabarmendu zuen Gemma Zabaleta Lan eta Gizarte Gaietarako sailburuak atzo, proposamenaren aurkezpenean.

Aldaketaren mamiarekin bat datoz tabernari asko. Tabernari eta zerbitzarien osasunarentzat onuragarria izango dela uste dute, lanean ematen duten denbora guztian ez dutelako kea arnastuko. «Argi dago tabakoa dela tabernariok dugun lan arrisku nagusia», gogorarazi du Carlos Sobronek, Gasteizko Aiztogile kaleko 7 tabernako arduradunak. Ordea, aldaketa egiteko moduak zalantza asko sorrarazten dizkiola aitortu du.

Hasiera gogorra

Legea egun batetik bestera ezarri nahi izateak arazoak ekar ditzake, Sobronen arabera. Egunez legea betearaztea errazagoa izango dela uste du; gauez, haatik, egoera zailduko dela gaineratu du. «Taberna batean 150 lagun badaude, tabernariak lanez gainezka... zer egin behar dute? Polizia lana egin, parrandan dagoen erretzailearengana joan, eta liskarra sor dezakeen jokabidea hartu?».

Tabakoa debekatzeak dakarren aldaketa duela lau urte bizi izan zuen Gasteizko La Taberna de los Mundos-eko arduradunak, Antonia Camposek: «Hasieran adineko batzuek ez zuten ondo barneratu, baina orain denek errespetatzen dute». Are gehiago, gaur egun bertara doazen pertsona gehienak kerik gabeko gune baten bila heltzen direla gaineratu du. Langileek ere «biziki» eskertu dute kerik gabeko taberna batean lan egitea. «Arroparen usaina, ilea... asko nabaritu dugu».

Aldaketa posiblea dela erakusten duten adibideak daudela azpimarratu dute alde guztiek. «Irlandan Euskal Herrian baino mozkorti gehiago dago, hotz handiagoa egiten du, eta lortu dute tabernen barruan ez erretzea», dio Sobronek irribarretsu. Alor horretan ez du uste tabernekek bereziki sumatuko dutenik. Ordea, legea aldatu eta gutxira isunak jartzen badituzte taberna batzuek itxi egin beharko dutela uste du. «6.000 euroko isunei aurre egiteko moduan dauden tabernak gutxi dira». Tabakoaren Lege berritua betearazteko, apurka jotzeko eskatu dute tabernari askok, eta hori eztabaidatu beharko du gaur Zabaleta sailburuak ostalarien arduradunekin egingo duen bileran.

Adingabeen babesa helburu

Adingabeen babesa lehenetsi nahi du Jaurlaritzak ere lege aldaketaren bitartez. Ezin izango da erre adingabeentzako guneetan, parkeetako jolastokietan, adibidez; ezta horiei zuzendutako ikuskizunetan ere. Are gehiago, ibilgailu pribatu batean adingabe bat badago, ibilgailu barruan erretzea debekatzea proposatu du Eusko Jaurlaritzak, eta isun arin moduan zigortuko litzateke.

Zabaleta sailburuaren arabera, lege aldaketaren helburua ez da zigortzea, baizik eta herritarrak hezteak. Baina bi alde horien arteko oreka ondo zehaztu beharko du Jaurlaritzak, haizeteak kalterik eragin ez dezan.

IDATZ EZAZU ZURE IRUZKINA:



Urlia 2010/10/14 @ 16:02
